

## Kerweredd 1993



vorgetragen von den 3 Kerweborschen Jochen Silbermann, Matthias Weber und Dietmar Post  
Das „ 3 Kerweparrer Jahr „

J: Wu iss es oam schenschde im gonze Loand,  
wu is die schensch Kerb- im Umkreis bekannt,

D: wuwochse die Rouse, sou schee wie nie,  
wu fließt der gute Woi, wu gäit meer gern hie,

M: wuhie hott meer sich schon immer gern verärnt,  
naderlich uff die Hoambecher Brennesselkerb !

J: Noch dem scheene Umzug, woas e Strapatze, woas e Mieh  
Erhebe meer erschd emol das Glase, mer schwitze die Knie  
Und trinke en grouße Schluck mit Prost,  
es grießt eich die Kerweborsch

Jochen Silbermann, Matthias Weber und Dietmar Post!

J:

M:

D:

Lied : Ein Prosit der Gemütlichkeit !

J: Meer wolle heit berichte gonz gewiss,  
was des Jahr und letschd Jahr alles sou geloffe is !  
Mit de männliche jugend im Ort dess is sou e Sach,  
des Schlofe macht denne om meischde Spaß,  
nix Fasnacht, nix Kerwe, loßt mich doch in Ruh,  
heert meer oftmols immer zu !  
Sou mußte holt, demits gibt koa Maleer,  
die drei fun de alte wieder her !  
Un.....

D: in Ober- Hoambach war desmol vun vornheroi klar,  
es gebt koan Kerweumzug in diesem Jahr,  
über diese Gerücht mußte jeder im Unnerdorf lache,  
denn jedes Johr dun meer en Umzug mache,  
zur Information ich sage kann ,  
ruft doch in Unner- Hoamboach grade mal an !  
Was wer des Lewe im ort sou leer,  
gebt es bei uns koan Umzug mehr,  
aach negschd Johr sin meer sou frei,  
beim 25 järische sinn meer debeil!

D: Seitdem der Hübners-Wolfgang in Ower- Hoambach soi  
Wärtschaft zugemacht hott,  
isses sou mont meer ruhisch worrn im owwere Ort,  
doch stell ich noch moim Erkunde fesd,  
die häwwe alle woch e onneres Fesd,  
ob im Freie oder in de Scheier,  
jedesmol e onneri Feier,  
newe em Ebbelwoikönig als Monn fun Welt,  
häwwe se jetzt ach noch e Riwwelkuchekönigin dezugestellt,  
e Gummernkönigin häwwe se noch nett gefunne,  
e Kartoffelköniginis ach noch nett kumme,  
Vielleicht noch en König vor die Latweije,  
negscht Johr gibt's denn AA, Ehr wird emol seije  
Uffs Owwer- und uffs Unnerdorf,  
trink ich jetzt en Schluck Woi,  
vunn rischdisch Hoambächer Rebensaft,  
wie kennts aach onnerschd soi !

MUSIK

M: Die Ortsstroß dorchs hoambächer Tal,  
is jetzt e Autobahn, allererster Wahl,  
vor allem dorch die Wäschinggass,  
macht des Raase om meischde Spaß,  
un vun dem morz Fahrtwind ohne Ruh,  
gäit bei de Mitsche-Brigitte die Geschäftsdeer automatisch,  
uff und zu !  
Beim Schusters-Hans, es is nett schäi,  
griecht moncher als die Kurv nett mäi,  
demit dord koaner en Unfall macht,  
wer dord e Gummimatt gut angebracht,  
en Airback Made im Rousetal,  
dett den Schloag mildern uff jeden Fall,

denne Schusters solls jo nett sou gäi,  
dass eines Nochts die Autos in de Schlofstub drinnnnn stäi !  
Unsern Ortsbeirat dutt sich nei konstiuieren,  
hoffentlich dun die in Zukunft nett sou dischbediern,  
macht liewer des wos Sache is,  
räigt eich nett zff iwwer kloane Fisch !  
Im Ortsbeirat do därfs nett rauche,  
Gemeinsam handle, is dess wos meer brauch,  
dutt ach liewer des öftern minnander lache,  
die grouß Politik kenn jo die in Hepprum mache !

Lied: Göi mol in de Keller, trink e Fläschel Woi !

J: Meer schreibes gern in die Anale,  
zur Fasnachtszeit wor in Hoamboach die Zentrale,  
mit Schirmherr Norbert und Schirmherr Karl,  
wurd Fasnacht gefeiert überall,  
in Erbach, Sunnerbach und iwwerall im Land,  
sind die singende Schirmherrn jetzt bekannt ,  
zwaas Schirmherrn allerbesten Wahl,  
gonz Hepprum is begeistert fum Rousetal !  
ich brauch jetzt wie kennts onnerschd soi,  
en grouße Schluck vum Bergstäßer Woi !  
Ach vun unsere veele Wäirtschafte kann ich berichte,  
denn dodruff will ich nett verzichte,  
sou mancher der dord schaffe dutt,  
der wärd schell mied , des gäit ruck-zuck,  
sou gings aa dem Tellerwäscher vunn de Wachauer Stubb  
der war holt mied, der wor kaputt  
und statt hoam zu gäi ins eigene Bett enoi,  
gäit der zu de Elfriede in die Rous und schläft im Houfklo oi !  
und die Moral fun der Geschicht,  
Ernscht, säh zu , dass de es negschde mol doi Bett verwischt  
Mimm schlofe hott jo sou moncher Maleer,  
der one leit leng, der onnere puer,  
doch leit in doim Bett om End noch doin Hund,  
denn werds sou monchem doch zu bund,  
Sou muß jetzt de Wilfings-Otto, demit er nett ins Hotel muß,  
denn des wär sehr deier,  
zukünftig die Nocht uff em Schesslong leie !  
Aach schunn moijens is der Hund voll debei,  
der frisst aach noch die schoal vum Frühstücksei !  
Ach, wos hott des DRK jetzt e scheenes neies Haus,  
als Geräteschuppe solls diene,

mit Vorhäng sieids wie a kloa Wohnung aus !  
unn die Zeitung hott bericht,  
wieveel Stunde des DRK hott sou verricht !  
vum Mauern und zum Verbutze,  
vum Hämmern bis zum Klinkebutze,  
unn... oaner hott mäi Stunne als zomme die Helfer fürwahr,  
auch wenn er nur die Uffsicht war !  
unser Motto an die Uffsicht:  
Schaffe ,schaffe, Häusle baue,  
un Alfred, ned sou vell noch de Helfer schaue

Lied : Schaffe, schaffe, Häusle baue !

D: In Hoamboch wärd jo vell geschafft,  
vell Leit lewe fun de Landwirtschaft,  
der one hott Kieh, der onnere Sai,  
un Gaase sin mitunner ach noch debei !  
Wos is die Welt doch sou verkehrt,  
wenn sich die Nochberschaft beschwert !  
Sou gings beim Ungers-Rudi in de Wasserschöpp zu,  
  
de Nochber wollt in de Mittagszeit soi Ruh,  
des Gemecker fun denne Gaase, des wern koa Bosse,  
merr sollt en gefällisch ruhisch schlofe losse !  
Unser Monung zu dere Sach,  
merr Kaafe der e paar Ohrstöpsel,  
donn wärschde nett wach !  
Wenn oaner eine Reise tut, dann is es ganz enorm,  
die KC Revolution war vorsjohr fort, die worn jo mords in Form,  
uff Mallorca, ach wie schee, hatte se e Hotel bestellt,  
un in denne wenische Doache, die Insel uff de Kopp gestellt !  
Doch als Leit vum Land,  
isses jo aach meischd bekannt,  
dass mer, weil mer jo nett gugt,  
sich als mol verlaafe dutt !  
Sou häwwe e Paar, des wor jo ka Wunner,  
noch ner Tagesreis ehr Hotel nett mäi gfunne,  
gonz verzweifelt mit wenisch Geld,  
sinn se dorch die Stadt gerennt,  
drumm häwe meer e groußei Bitt,  
nemmt es negschde mol bitte en Stadtplan mit !

Wer reitet so spät durch Nacht und Wind ?  
Es is ned de Erkönisch, es is die Hedi aus de Wasserschepp, des Liewe Kind

Der Doag meest hou mäi als 30 stunn,  
denn kempt die Hedi mit ehrner Zeit aach rum !  
Sou woars bei ehr ach vor drei vier Woche,  
die Hedi wor groad beim Gelee oikoche,  
nochts um elfe hott se sich besunne,  
„ Ich muß jo noch schnell zum Schuh Löffler nunder „  
zum Glick is de Bernhard Löffler en gute Mann,  
den meer ach nochts noch uff häwwe ehr Leit,  
trinke meer ein Prosit der Gemütlichkeit !

Lied : Ein Prosit der Gemütlichkeit !

M: Sou ehr Leit, des wors vor heit,  
zum große spaß worn meer bereit

D: unn wonn sich oner äijern sollt,  
denn wor des sicher nrтт gewollt,

J: noch oan Schluck Woi und veel Applaus,  
meer gäihn jetzt mit de Kerwekönigin aus diesem Haus,  
doch wie kennt es onnerscht soi,  
henkt eich all minoner oi,  
und singt all mit Choral,  
unser Lied fum Rousetal !